

四庫全書

史部

欽定四庫全書

皇朝通典卷七十四

兵七

恩卹

臣等謹按御兵之道必在紀律嚴明恩威並濟我朝

列聖相承

豐功偉業

厚澤深仁並著方策

皇上御極以來西域蕩平金川底定

天戈所指衆志成城蓋由軍政素嫻是以臨事無不
踴躍赴功克敵致果用集

鴻勲猶復

湛恩廣被

睿慮周詳如改定內外武職養廉給與綠營陣亡卹廕
諸大政皆所以策勵戎士軫念成勞又如勻派養

育兵額銀米及撥給鰥寡孤獨錢糧所以謀八旗
生計者至優且渥茲於

皇朝兵典內專輯

恩卹一門仰見我

皇上經武整軍

體卹優養無微不至所由人人感奮迅奏膚功昭
赫濯於千古也謹臚敘於左

一 改定武職養廉舊制八旗武職親隨名糧領侍

衛內大臣滿洲都統各給八名蒙古漢軍都統前
鋒護軍統領六名民公滿洲副都統四名侯伯蒙
古漢軍副都統三名內大臣子內府三旗叅領前
鋒護軍驍騎各叅領二名前鋒護軍驍騎各副叅
領前鋒侍衛一名有半散秩大臣王府長史男內
府三旗佐領八旗佐領一名每親隨一名月餉銀
三兩米二斛折銀一兩於領米時給發步軍統領
九名步軍翼尉四名協尉三名副尉捕盜官二名

步軍尉一名均於額設步軍內撥給綠營武職親
丁名糧提督八十名總兵官六十名副將三十名
叅將二十名遊擊十五名都司十名守備八名千
總五名把總四名各按營伍以馬步守均勻配搭
支食外委千把總加給步糧一分

乾隆八年

諭國家體卹臣工文武皆屬一體文職則給養廉武職
則給親丁名糧以資養贍自康熙四十二年部議由

提鎮以及千總覈定數目之後復於雍正六年特奉
皇考上諭令武職去任之後將名糧停扣不必募補即留
與接任之人所以體卹之者更為周至是以武職親
丁雖年年造冊究繫虛名開載實無其人名實不符
衆所共知朕思既為武職養廉即應改為養廉名糧
將親丁姓名裁去毋庸虛造冊籍其各省武職親丁
名糧向來如何分別多寡今如何定例之處該部議
奏即經遵

旨議准改為養廉名糧核實造報其外委千把總例給隨糧一分亦歸入養廉名糧項下一律造報十年戶部奉特旨賞給八旗大臣官員養廉歲支銀八萬六千兩計領侍衛內大臣九百兩八旗滿洲都統七百兩前鋒護軍統領蒙古漢軍都統各六百兩步軍統領滿洲副都統內務府總管各五百兩內大臣散秩大臣蒙古漢軍副都統兩翼翼尉內府三旗統領內務府奉宸

上駟武備院卿各四百兩健銳火器營翼長圍場總管各二百兩圍場翼長一百兩其自八旗滿洲蒙古漢軍各叅領印務章京八旗護軍各叅領

圓明園三旗各叅領兩翼前鋒叅領侍衛健銳火器營營總叅領八旗察哈爾總管等官每年俱按大臣養廉支剩銀兩儘數分給四十六年奉

上諭向來各省提鎮以下至將弁等俱有分扣兵丁名糧作為得項者此固舊例如此且武職衙門非如文

員之定有養廉是以即將此項為公用養贍之資但此例定自何年或係雍正年間議定文職養廉時一體酌給其每員應得若干係何名目各省是否一例按照地方情形品級大小酌定數目多寡又或各省參差不同著交各該部將定例年月及現在款項數目分析查明開單具奏至此事因仍已久恐又有於定數之外私自剋扣增添者若每員任內私扣一名後任積漸加增侵扣無所底止督撫姑息不加查察

久之即為虛額空糧之弊尤不可不徹底清查著即
通諭各督撫將各省提鎮以下武職現在分扣名糧
實數及有無私添之處查明據實具奏此事既久朕
概從寬不究若稍有隱匿或致別經查出惟該督撫
是問將此通諭知之又奉

上諭國家設兵衛民簡核軍實期於行伍整齊兵額充
足如兵丁等紅白事件從前設有生息惠濟銀兩以
資賞卹後因生息名色有關國體特敕停止昨據阿

桂等奏陝甘添兵案內籌及賞卹聲請酌復惠濟銀
兩朕以國家賞兵之費藉商生息支給究屬非宜已
傳諭阿桂等令其動用正項開銷矣茲袁守侗海祿
前赴行在令軍機大臣傳旨詢問直隸雲南賞兵銀
兩支銷款項據稱直隸裁扣公糧銀二萬兩雲南裁
扣公糧銀一萬六千餘兩以備賞用等語看來各省
大都如此兵丁紅白銀兩原係加惠行伍格外施恩
若因此裁扣公糧致兵額不足殊非核實行伍之道

況今戶部帑項豐盈各省藩庫積存充裕即現在京營添兵四千九百餘名陝甘二省各營添兵一萬三千九百餘名其馬步糧餉合之各省兵丁賞卹紅白銀兩約算歲支尚不及百萬國家何靳此費不令開銷正帑各省乃紛紛裁扣名糧又且請復生息甚無謂也朕臨御四十六年以來惟事事以敬

天勤民為念凡三次普免天下地丁錢糧兩次普蠲各省漕糧以及遇災即賑總計何啻萬萬又並未加增賦

稅仰荷

上蒼嘉祐開拓邊陲府藏殷實國用充饒朕又豈肯稍存
靳惜致令有司開聚斂剋扣之端乎所有各省行伍
賞卹兵丁紅白銀兩自乾隆四十七年為始俱著於
正項支給造冊報部核銷至各省提鎮以下武職員
弁俱有應得坐糧馬乾等項前於六月內業經降旨
通諭各省督撫將各該省武職所得公項逐一查明
覆奏俟奏報到日令軍機大臣會同該部核辦照文

員之例議給養廉其所扣兵餉即可挑補實額核計
添給養廉歲支亦不及二百萬兩官員既無拮据而
各省又添增兵力於行伍大有裨益朕御極之初戶
部庫項不過三千萬兩今已增至七千餘萬復有何
不足而不加惠天下散財以得民乎所有辦理添補
兵額紅白賞卹銀兩及名糧裁添養廉緣由明晰曉
諭中外知之嗣據直省各將武職應得養廉名糧數
目陸續具奏經戶部酌核章程統歸畫一以垂永

久按各武職品級大小通同比較定額提督每員
給養廉銀二千兩總兵一千五百兩副將八百兩
叅將五百兩遊擊四百兩都司二百六十兩守備
二百兩千總一百二十兩把總九十兩經制外委
千把總每員十八兩每年照文職養廉例於耗羨
項下動支又以在京巡捕五營員弁管轄地方處
分較重並非外省各營專事操防者可比所有步
軍統領向係部旗大臣兼理應得養廉名糧銀八

百八十兩照舊支給外其副將核給養廉銀九百兩叅將六百兩遊擊五百兩都司三百兩守備二百四十兩千總一百四十兩把總一百兩外委二十兩又以甘肅之烏魯木齊等處雲南之騰越鎮龍陵協四川之崇化綏寧靖遠懋功撫邊五營或係新疆或在邊境亦與腹地情形迥異酌給甘肅省烏魯木齊提督養廉銀二千八百兩伊犁巴里坤總兵各二千一百兩瑪納斯哈密副將各一千

二百兩其叅將各八百兩遊擊六百兩都司三百
八十兩守備三百二十兩千總一百八十兩把總
一百二十兩外委二十八兩雲南騰越鎮總兵一
千六百兩龍陵協副將九百兩其遊擊四百五十
兩都司三百兩守備二百二十兩千總一百四十
兩把總一百兩外委二十二兩四川崇化等五營
遊擊二百五十兩都司三百四十兩守備二百六
十兩千總一百六十兩把總一百二十兩外委二

十八兩通計直省大小員弁原扣名糧銀一百三十六萬八千四百七十六兩改給養廉銀一百三十二萬五千七百十六兩仍節省銀四萬有奇其雲南省之提督總兵福建省之臺灣鎮總兵舊有額外動支耗羨公件銀兩廣東水師各營舊有額外加增草乾銀兩一併刪除毋庸重給再各省綠營兵丁紅白賞卹銀兩既遵奉

恩旨動支正項所有各省原動用之裁扣節省各款應

查明分別正閒款項另行提解及存為武職養廉支銷之用等因具題奉

旨依議雲南提督總兵及福建臺灣總兵或地當烟瘴或遠隔重洋均與腹地不同著加恩於議給養廉外雲南提督加賞銀五百兩雲南總兵及福建臺灣總兵各加賞銀二百兩以示朕軫念巖疆加惠戎行之至意一設八旗養育兵

雍正二年奉

諭八旗滿洲蒙古漢軍均係累世効力舊人承平既久滿洲戶口滋盛餘丁繁多或有人丁多之佐領因護軍馬甲皆有定額其不得披甲之間散滿洲以無錢糧至有窘迫不能養其妻子者朕每思及此惻然動念將如何施恩俾得生計之處再四籌度並無長策欲增編佐領恐正項米石不敷若不給以錢糧俾為養贍何以聊生既不能養其家口何由就造以成其材今將旗下滿洲蒙古漢軍內共選四千八百人為教養兵訓練藝業所

挑人等只給三兩錢糧計四千八百人一年共需錢糧十七萬二千八百兩每一旗滿洲蒙古漢軍共六百名內蒙古旗下六十名漢軍旗下八十名其漢軍之八十名令為步兵食二兩錢糧就此錢糧數內通融料理可多得四十名兵丁每一旗著挑取一百二十名再看軍器內長槍尤為有用著滿洲蒙古每佐領下挑取護軍四名馬甲四名令其學習長槍漢軍每佐領下挑取馬甲四名令其學習藤牌挑刀此四千八百名教養兵

若計佐領挑取恐其人多寡不同應於旗下扎蘭內計其人數挑取如此則護軍馬甲益得有用之人而閒散餘丁亦得學習成就矣至於如何編錄教訓管轄之處八旗都統護軍統領副都統等公同定議具奏

乾隆三年復定滿洲蒙古各旗原設養育兵每二名出缺作為三名照漢軍例各給銀二兩滿洲蒙古旗每佐領下增足養育兵十名漢軍旗每佐領下增足六名十八年復定養育兵每三名出缺作

為四名再

恩賞一名各改給銀一兩五錢於原養育兵一萬五千一百二十四名外勻出缺五千四十四再

恩賞缺五千四十四共二萬五千二百十二名食銀四十五萬三千八百十六兩二十九年復定滿洲蒙古之養育兵二萬三百十五名每年增食米一萬六千一百石有奇三十六年因

賞給八旗鰥寡孤獨錢糧將八旗滿洲蒙古漢軍各養

育兵數按三兵一缺均勻經軍機大臣會同戶部
八旗都統核議定額八旗滿洲應得養育兵共一
萬七百九十八缺八旗蒙古應得養育兵共三千
二百七十九缺八旗漢軍仍照原額養育兵四千
八百十三缺

圓明園各旗營酌給養育兵一千缺健銳營酌給五
百缺火器營酌給一千缺又以三營節省之一千
八百六十六缺

賞給八旗滿洲俾

特恩廣被實惠普霑交與各旗營一體遵照辦理

一武職封廕滿漢文武官階正一品建威將軍從
一品振威將軍正二品武威將軍從二品武功將
軍正三品武義都尉從三品武翼都尉正四品昭
武都尉從四品宣武都尉正五品武德騎尉從五
品武德佐騎尉正六品武畧騎尉從六品武畧佐
騎尉正七品武信騎尉從七品武信佐騎尉正八

品奮武校尉從八品奮武佐校尉正九品修武校尉從九品修武佐校尉其現任本職及終養丁憂回籍人員恭遇

覃恩得請封贈一品上及三代二品三品上及二代四品五品上及一代給以

誥命六品七品給以

敕命亦上及一代

妻室封典均視文職

如有請貤封贈者均論服

制不准旁推八品以下祇給本身

敕命一軸有願貤封贈其父母者亦聽凡

恩廕內外現任武職二品以上恭遇

恩詔錫廕各送一子入監讀書三年期滿咨吏部授官

其廕監生未仕而歿或病廢者准其補廕一次之

後不准再補所送承襲之人必以適長子如無適

長子或有而病廢及有別項職事則廕適長孫其

次子次孫及期親兄弟子孫並承繼之子孫均按

其倫序以次承襲該管官取具承廕之人年貌姓

名文冊及親供印結送部查其所生在

詔前者准為題請得

旨後給以執照若本官曾遇

恩詔已送子入監後經陞任又遇

恩詔欲改廕者未仕監生准其改廕至所廕監生於承

襲之後別授他職及中科目者不准補廕其八旗

廕生願改武職者照所應得品級隨旗行走准予

食俸

盛京駐防及游牧察哈爾各官所得廕生情願來京者令其隨旗行走願留本處効力及綠旗廕生願改武職者並聽其難廕改為世職條例詳具陣亡卹典

一議敘軍功有

特旨優敘者由部覆議奏請隨時酌定其由統兵將帥列序官兵功績等次造冊送部者部核其實分為五等八旗官兵給以印軸曰功牌應授爵者移咨

吏部甄別授之自雲騎始按功遞加未至授爵者
由部註冊仍令圖功准其積算功牌之式以紫綾
為面用潔白厚紙裱襯一層四邊墨印螭文內註
明功次凡填功績及年月處鈐用部印編次號數
覈對給發一等功牌長二尺八寸二等功牌長二
尺四寸三等功牌長二尺二寸四等功牌長二尺
五等功牌長一尺八寸均各廣尺有五寸五分從
征有功者文職視武職王公所屬護衛親軍視官

兵委署官視見任各以所得軍功等第予敘綠旗
官兵第功議敘者曰功加其出衆人員准功加一
等紀錄五次立一等功者准功加一等紀錄二次
二等加一級紀錄一次三等紀錄三次四等紀錄
二次五等紀錄一次立功多者積算授以世爵文
職軍功應功加一等者准加一級敘功不實者各
論如法敘八旗官兵戰功用雲梯攻城視城之大
小攻之難易分五等一等敘六人二等敘四人三

等敘三人四等敘二人五等敘一人均移吏部授
爵賞賚以府州縣衛所為差等克府城者賞五人
第一人賞銀五百兩第二人三百五十兩第三人
二百五十兩第四人百五十兩第五人百兩領戰
官視第二人指示官視第三人射箭官視第五人
克州城者減府城一等克縣城者減州城一等衛
城與州城同所城與縣城同鑿毀城垣者視雲梯
攻城議敘以礮攻城及奪門入城者減雲梯攻城

一等議敘敵兵堅壁未克能越衆前驅破敵獲賊者敘三人第一人移吏部授爵賞銀百兩第二人給二等功牌銀八十兩第三人給三等功牌銀六十兩均註冊積兩次三等者准作一次二等積兩次二等者移吏部授爵交鋒時於本旗內出衆衝鋒克敵者敘三人第一人給一等功牌第二人給二等功牌第三人給三等功牌均註冊賞賚減前驅之半積至三次一等移吏部授爵執纛人以首

進續進為差首進者

兵未進而
轟先之

敘三人第一人移

吏部授爵賞銀百兩第二人八十兩第三人六十

兩續進者

兵將進而
轟隨之

叙一人賞銀五十兩交鋒時

一叅領下執轟人首進者叙三人第一人給一等

功牌賞銀五十兩積至三次一等移吏部授爵第

二人賞銀四十兩第三人三十兩續進者叙一人

賞銀二十兩水戰奪舟分舟之大小為三等一等

舟敘五人第一先登者賞銀二百五十兩第二人

二百兩均移吏部授爵第三人給三等功牌賞銀
百五十兩第四人給四等功牌賞銀百兩第五人
給五等功牌賞銀五十兩

功牌內註明
舟之等次

均註冊二

等舟敘四人第一先登者賞賚視一等舟之第二
人其餘以次遞減三等舟敘三人第一先登者賞
賚視一等舟之第三人其餘以次遞減其不列等
次之舟敘三人賞賚減三等舟十分之四先後所
得功牌准其積算得兩次一等舟三等功牌者移

吏部授爵餘均准此招撫敵兵千人敵舟三十艘者為第五等軍功兵增五百人舟增至十艘各加一等兵至三千五百人舟至七十艘者為一等軍功招撫城池以府州縣衛所為差等立功官兵未及議敘病故者均按其立功等次以為敘官得一二等軍功者給一子監生食七品官俸三四等軍功者給一子監生食八品官俸均令隨旗効力五等軍功者給一子監生准其應試兵丁給葬銀二十

兩得一等軍功者賞功牌銀五十兩二等以下每
等減銀十兩敘綠旗官兵戰功用雲梯克府城者
視城之大小分五等一等敘五人第一人授職叅
將其次遊擊次都司次守備次千總二等敘四人
授職自遊擊以下三等敘三人授職自都司以下
四等敘二人授職自守備以下五等敘一人授千
總克州城者分四等一等議敘視克府城二等二
等以下遞降授職克縣城者分三等克衛所城者

分二等遞降授職亦如之議叙四人以上者領戰官加二等指示官加一等議叙二人以上者加等半之議叙一人者領戰官加一等指示官不敘若攻陷城垣乘勢先登者授千總領戰官加二等賞賚以府州縣衛所為差等克府城者賞五人第一人賞銀二百五十兩次二百兩次百五十兩次百兩次五十兩次克州城者減府城一等克縣衛所城者減州城一等強敵在前陣堅壘固倡衆戰勝者

敘三人第一人授職守備賞銀五十兩次千總賞銀四十兩次把總賞銀三十兩勢均力敵率先摧鋒者敘二人第一人授千總賞銀三十兩次把總賞銀二十兩水戰奪舟者視舟之大小分三等大舟敘四人第一人授職都司賞銀百兩次守備賞銀八十兩次千總賞銀六十兩次把總賞銀四十兩次舟敘三人授職自守備以下賞賚視大舟之次以次遞降小舟敘二人授職自千總以下賞賚

視中舟之次以次遞降在舟之本管官及同戰官
視舟之大小加級紀錄有差礮手奪舟者敘功與
兵丁同以礮沉舟者一舟賞銀二十兩二舟授把
總賞銀四十兩三舟授千總賞銀六十兩多者以
次遞加招撫敵人自五百人以上舟自五艘以上
難民五千人以上計其多寡大小紀錄加級及功
加等次各有差立功官未及議敘病故者一二等
軍功給一子監生以把總用三四等軍功給一子

監生以外委把總用五等軍功給一子監生隨營食糧願應試者聽

一臨陣受傷加賞八旗兵丁陣前被傷者分別等差給賞一等傷給銀五十兩二等傷四十兩三等傷三十兩若被遠礮中傷者一等至三等各遞減十兩滿洲蒙古隨役陣前被傷者一等傷給銀三十兩二等傷二十兩三等傷十兩若被遠礮中傷者一等二等傷各減十兩三等傷減給七兩漢隨

役人陣前被傷一等傷給銀二十一兩二等傷十
四兩三等傷七兩被遠礮中傷者亦如之綠旗兵
在陣受傷者一等傷給銀三十兩二等傷二十五
兩三等傷二十兩又八旗兵丁傷至殘廢者照陣
亡例減半給賞仍別其殘廢之輕重加賚有差均
令該旗都統副都統取具佐領驍騎校保結叅領
印結驗明由部分別具題照例給予如傷雖殘廢
不能執弓櫓可行走者以看守

南苑倉庫等處兵丁補用其曾為護軍校驍騎校者
以各館廐長牧副補用

一優賞休退官兵旗員二品以上以老疾乞休者
由本旗稽其服官歲月軍功等次請

旨給以恩俸三品以下年逾六十曾經出征者給半俸
臨陣得有功牌者給全俸年逾五十曾出征得功
者給半俸由部覈實疏請旗員任直省武職者亦
如之綠營副將以下守備以上曾出征得功以老

疾休致者督撫提鎮覈實請

旨加賞恩俸分別年歲與旗員同八旗兵丁曾在軍前
得過軍功後因患病退伍或傷殘退伍及六十歲
以上年老退伍者該都統等覈實每月給銀一兩
米一斛以養餘年

盛京等處駐防兵止准給銀不給米由該都統將軍
等覈實報部彙奏綠營兵丁曾經行間効力後因
年老辭退報部准給守糧一分

一陣亡武職卹典滿漢各官視其品秩之大小為差給祭葬予贈廕以示

優恩八旗人員由本旗開列官階移咨吏部贈爵予廕
統兵叅贊都統授騎都尉兼一雲騎尉前鋒護軍
統領副都統授騎都尉營總叅領以下前鋒校護
軍校及有頂帶官員以上均授雲騎尉其先授世
爵後陣亡者按其等次加以應贈之秩合為一爵
令其子孫承襲至一等公以上無爵可加令其嫡

子襲一等公以別子襲其餘爵應得祭葬銀兩移
咨禮工二部照例議給綠旗營員由本部題請照
旗員例准予世職提督給騎都尉魚一雲騎尉總
兵給騎都尉副將以下把總經制外委以上俱給
雲騎尉報部委署人員按其委署品級議給候補
人員照實任官階議給如有先授世爵後陣亡者
准予合爵承襲至無爵可加亦准以別子分襲均
照旗員例一體辦理應得祭葬銀兩仍移文禮工

二部議給四十七年奉

諭旨陣亡人等照例給與世職襲次完後仍賞給恩騎尉世襲罔替而傷亡人等照陣亡人等給與世職已屬從優若再賞給恩騎尉似無區別嗣後傷亡人等毋庸議給恩騎尉四十九年奉

上諭向來旗員効力行間懋著勞績及臨陣捐軀者其子孫俱應得世職即年未及歲業經承襲尚未當差者亦給予半俸以資養贍而綠營員弁陣亡議卹之

例止得難廕一次非奉特旨照旗員加恩予卹不能得有世職而其子孫年未及歲亦不予襲蓋因綠營人員隨征打仗本不如旗人之奮勇出力而綠營所得俸薪養廉等項較多於旗人其軍功議敘及賞賚一切固不能一律亦所當然至効命疆場則同一抒忠死事朕不忍稍存岐視嗣後綠營員弁除軍功議敘卹賞仍照舊例辦理外若陣亡人員毋論漢人及旗人之用於綠營者總應與旗人一體給予世職卹

襲次已完亦應照例酌給恩騎尉俾賞延於世以示
朕獎勵戎行一視同仁至意又文職難廕向例三品
以上者以知州用四品以下者以知縣用布按二
司首領以下等官分別以縣丞主簿州吏目用均
止難廕一次四十九年奉

恩旨陣亡文職與武職一體照旗員例議給世職一品
官給騎都尉兼一雲騎尉二品三品官給騎都尉
四品官以下未入流以上均給雲騎尉襲次完後

仍賞給恩騎尉


一卹賞陣亡官兵八旗民公侯伯領侍衛內大臣
內大臣都統將軍一等子賞銀一千一百兩次二
等子次三等子次一等男兼一雲騎尉次前鋒護
軍步軍各統領副都統一等男次二等男次三等
男散秩大臣一品不典兵官次營總翼長叅領總
管副總管城守尉協領一等侍衛一等輕車都尉
魚一雲騎尉次一等輕車都尉次二等輕車都尉

次三等輕車都尉王府長史一等護衛二品不典
兵官次騎都尉兼一雲騎尉次騎都尉三品不典
兵官次前鋒侍衛各營副叅領佐領二等待衛防
守尉次雲騎尉司儀長二等護衛四品不典兵官
次三等侍衛各散秩官次三等護衛五品不典兵
官次前鋒護軍親軍驍騎等校藍翎侍衛六品官
以上遞減銀五十兩恩騎尉七品八品官二百二
十兩前鋒護軍親軍領催及執纛人二百兩驍騎

百五十兩其委署官及世爵小或無世爵者各照
本職應得卹典礮手百三十兩各部未披甲通事
滿洲蒙古隨役百兩漢隨役七十兩綠營官兵提
督賞銀八百兩次總兵官次副將次叅將次遊擊
各遞減百兩都司三百五十兩次守備次守禦所
千總次衛千總次營千總次把總各遞減五十兩
外委官視把總馬兵七十兩步兵五十兩土兵減
步兵一半又出征病故文武各官一二品提鎮以

上遺本到部應否卹賞候

旨遵行其副將以下及三四品官賞銀五十兩五六品
官四十兩七品以下三十兩八旗兵遠方出征除
陣亡外有不服水土病故者賞銀二十兩



皇朝通典卷七十四

欽定四庫全書

史部

皇朝通典卷七十五至
八

編修臣 李傳熊覆勘

總校官編修臣 程嘉謨

欽定四庫全書

皇朝通典卷七十五

兵

軍令

天命三年

太祖高皇帝興師伐明

諭諸貝勒大臣俘獲之人勿去其衣服勿淫其婦妾勿離
異其匹偶拒戰而死者聽之若歸順者慎勿輕加誅戮

天聰三年

太宗文皇帝諭朕仰承

天命興師伐明拒戰者不得不誅若歸降者雖雞豚母得
侵擾俘獲之人毋離散其父子夫婦毋淫人婦女毋掠
人衣服毋拆廬舍祠宇毋毀器皿毋伐果木如違令殺
降淫婦女者斬毀廬舍祠宇伐果木掠衣服及離大轟
入村落私掠者鞭一百又毋食明人熟食沽酒聞山海
關內多有鴆毒更宜謹慎以乾糧飼馬或馬匹羸瘦可

量煮豆飼之肥者止秣以草俟休息時再飼以糧凡採取柴草毋得妄行須聚集衆人以一人為首有離衆馳往者拿究如有故違軍令者將不行嚴禁之都統叅領佐領一併治罪

崇德三年

諭凡和碩親王多羅郡王多羅貝勒固山貝子臨陣交鋒若七旗王貝勒貝子却走一旗王貝勒貝子拒戰七旗獲全即將七旗佐領下八丁給拒戰之一旗若七旗拒

戰一旗却走即將却走人丁分與七旗若一旗內拒戰者半却走者半即以却走人丁分給本旗拒戰者有因屯劄他所未拒戰而無罪者免革人丁其拒戰之王貝勒貝子別行給賞若七旗未及整伍一旗王貝勒貝子拒戰得功者按功次大小俘獲多寡賞之野戰時本旗大臣率本旗軍下馬立王貝勒貝子等率護軍乘馬立於後若與敵兵對仗王貝勒貝子大臣不按隊伍輕進或見敵寡妄自衝突者奪所乘馬匹及俘獲人口凡兩

軍相對必整齊隊伍各按汛地從容前進如擅離本隊
隨別隊行擅離本汛由他汛入及衆軍已進獨却立觀
望者或處死或籍沒或鞭責或革職或罰銀酌量治罪
凡整伍前進稍有先後毋得彼此爭論但以按汛擊敵
不致退縮為上若有以此爭論者即為立心不端之人
如敵人不戰而遁我軍追擊之宜選精兵驍騎合力馳
擊護軍統領不得前進止宜領纛整伍分隊以躡其後
倘遇伏兵或於追躡時遇敵旁出護軍統領乃親擊之

凡大軍起營時各按佐領旗纛整隊而行若有一二人離隊往來尋索遺物及酗酒者皆貫耳自出城門務遵軍律肅靜行伍毋得喧譁都統副都統叅領護軍統領佐領以次各有統束統束嚴明則該管隊伍豈有喧譁之理今後有喧譁者該管官坐以應得之罪喧譁者責懲軍行時如有一二人離旗行走者許同行入即報送本都統執送者賞銀三兩下營時凡取薪水務集衆同行妄致失火者斬軍士甲冑均書號記冑兩旁皆用圓

鐵葉無甲者衣帽後亦書號記一切軍器自馬絆以上均書姓名馬必繫牌印烙不印烙者罰銀二兩箭無姓名者罰銀二十兩如得他人箭隱匿不出者亦罰銀二十兩軍行時若見禽獸馳馬追射者兵丁射以髑箭貝子大臣坐以應得之罪夜行時每佐領人等有別吹竹為號者執治貫耳若不執治議叅領罪盜鞍韉及轡絡羈絆者按法治罪若馬上行李偏墜應整理者本旗人均站立待整乃行兵入敵境時若有一二人離營私掠

被殺者妻子入官仍治本管官罪勿毀寺廟勿妄殺平
人抗者戮之順者養之俘獲之人勿褫其衣服勿離散
人夫婦雖不為俘獲者亦不許褫衣侵害其俘獲之人
勿令看守馬匹如有一二人妄取糧草被殺者罪與離
伍擒掠者同勿食熟食勿飲酒前此我兵飲食不慎以
不知敵人置毒於中耳今時曉諭宜加謹慎有不遵者
依律治罪

順治八年定發兵之時或在家或在外違限者該

管叅領佐領等官每兵一名罰銀五兩若至革職等重罪候

旨定奪兵丁不遵約束抗違者酌量罪犯責懲該管官仍行議處十三年定隨征前鋒護軍領催驍騎廝養卒等私自逃回初次鞭一百遞發軍前二次正法

康熙十一年題准官員出征在家規避不起身者革職在外違約者革職提問護軍及領催驍騎等在家規避不起身者鞭一百仍發軍前在外違約

者鞭一百所獲人口入官若係差遣之處不遵號令違誤者鞭一百出兵之處不遵號令妄行者為首人正法餘各枷三月鞭一百該管官罰俸一年十八年

聖祖仁皇帝諭領兵諸王將軍等藉捕賊為名燒民房舍擄掠子女搶奪財物或分兵所往之處私自擄掠者令督撫題叅治罪如督撫隱匿事發日督撫革職十九年題准或攻城或野戰如將陣亡屍骸不能救出者

同戰之叅領散秩官護軍校驍騎校降二級調用
領戰之該營總降一級調用領戰之大員罰俸一
年二十三年議准官兵被傷退回者若係一二等
傷痕免議三等以下傷痕仍與失利者同罪如未
經被傷冒作傷痕退回者照規避例治罪若係官
員重傷止許親隨人等送出無親隨人令驍騎一
二名護送兵丁重傷亦止令驍騎一二名護送多
差者將差撥各官治罪多送之驍騎亦同議處二

十九年

諭本朝自

列聖用兵以來戰必勝攻必克所向無敵者皆以賞罰明
法律嚴兵卒精銳器械堅利人思報國殫心奮勇之所
致也今軍行其令各該都統以下察覈軍實凡甲冑弓
矢諸軍器務令犀利堅好盔甲均繫號帶並書旗分佐
領姓名繫於馬尾其行也視大纛整隊齊發有零星前
後亂行及酗酒者該管官立拿懲責其止也各按旗分

隊伍分別屯劄有前後錯亂者罪及該管大員馬無印
矢無名各罰以銀給拿獲者竊取鞍轡什物馬匹者視
其多寡之數治罪失火者從重究懲官兵廝役所過地
方毋騷擾毋搶掠毋踐踏有擅離營伍入村落山谷奪
人財物者軍法從事並罪本主及該管官軍士廝役逃
亡在汎界內立行察拿治罪如出汎界外該管大員即
遣官兵窮追務獲立斬以徇如不能獲即將往追官兵
從重治罪其逃人之主及該管官一并嚴行究懲既出

我境哨探斥堠務期嚴密如曠野列陣交兵王貝勒貝子公大臣有不按次序攙越前進及見賊兵寡弱不復請令冒昧前進者有功不叙仍治以罪其進也須齊列緩轡按隊前行如自離其隊而附人後或自棄其伍而入別行或他人已入而獨留不進者其應斬應籍沒及懲責革罰分別治罪如整旅而進擊敗賊兵厥功維均勿以畧分先後致生爭競至敵兵不戰而潰則選精騎追逐之後隊躡踪而進如遇伏兵或賊兵有旁出者則

後隊接戰夫兵者所以討逆而安順也領軍大臣果能
嚴束其下不使良民受害膺上賞違者罰無赦凱旋之
日有以兵器私售蒙古者本人治罪並及該管官馬乃
大軍急需須視水草佳處小心牧養起行時則留將卒
察遺失之馬轡驥尾所繫字樣交還原主如係疲馬則
開明馬色數目交所在官司人民蒙古善為牧養報知
兵部如有隱匿私乘及殺之棄之者治以罪其遺失馬
匹之人亦開明馬色報兵部存案恐官兵未能徧知爾

部其刊布曉諭之

雍正元年

世宗憲皇帝諭自古用兵之道首以申明號令為務周易曰師出以律周書曰不愆於六步七步不愆於四伐五伐乃止齊焉可知進退步驟之間尺寸不可違越方為節制之師必須平日申明號令使三軍之士無不熟知深曉倘其中或有不遵者則按軍律置之於法是其獲罪乃本人之自取無所歸咎雖領兵將帥不能以己意

一毫輕重於其間此大公之道也我國家武備精強迢越往古從來軍行之際紀律嚴明信賞必伐是以天戈所指迅奏膚功此中外臣民所共知者今承平日久新進少壯之人未曾親履戎行則於從前規制未必一一諳練若不詳細申明宣諭以致官弁兵丁等或因陷於不知而遽罹罪譴朕心實為不忍令特令大臣等酌議軍令條約經朕親加覽定凡大端細務莫不備載其中者蓋以軍機關繫至重必使事事合於紀律人人祇奉

章程勿犯重罰而妄冀從輕勿因事小而不遵成法將來荷

天眷佑奏凱言旋凡我弁兵等數十萬人有大功而無小過此則朕心所厚望者也著即刊刻交與兩路大將軍通行頒布咸使凜遵旋議准凡戰陣之際聽掌號擊鼓鳴金為進止聞鼓不進聞金不止者斬遇敵進戰有回顧畏縮交頭接額私語者斬專司掌號擊鼓鳴金之人聞令即掌號擊鼓鳴金令止即止違者

八旗兵鞭責四十綠旗兵棍責三十臨陣違令者
斬大將軍密傳軍令轉傳之人增減要言者斬大
將軍授緊密軍令私告他人以致宣揚誤事者斬
官兵殺傷良人冒功者斬掠取他人戰功及詭稱
功績以無為有以輕報重者斬沿途欺壓民番恃
強買賣掠財物毀房屋姦婦女者皆斬指稱夢見
鬼怪造言惑衆者斬兵丁中途染病該管委署護
軍校領催紅旗管隊即同護軍校驍騎校千總把

總一同驗確稟明該管官令醫調治如不驗看醫
治該管委署護軍校領催鞭五十紅旗管隊棍責
四十護軍校驍騎校千總把總插箭如兵丁詐病
偷安者斬大將軍與同官密議軍情有私行竊聽
者斬差往探聽賊人形勢畏縮不往詭稱已去妄
報虛實及探聽不實貽誤軍機者斬獲逸馬隱匿
私乘不給馬主者八旗兵鞭五十綠旗兵棍責四
十仍插箭遊營有獲馬私宰或售與別人者皆斬

臨陣竊馬潛逃者斬傳首示衆如在劄營地方犯者八旗兵鞭一百綠旗兵棍責八十劄營地方輪班守卡嚴肅訪察夜遇警急即密稟申報設備以俟有驚怖喧譁擾動散走以致亂營者斬私語嗟怨長噓短嘆者八旗兵鞭七十綠旗兵棍責六十責後復犯並臨陣時故違者斬黑夜無故驚呼疾走致亂營伍者斬白晝犯者八旗兵鞭五十綠旗兵棍責四十面承該管官諭令辭色傲慢者八旗

兵鞭五十綠旗兵棍責四十有意抗違致誤軍機者斬疎防失火燒燬草廠八旗兵鞭一百綠旗兵棍責八十若臨敵境失火致燒草廠者斬失火致燒衣服器械八旗兵鞭五十綠旗兵棍責四十如在存貯火藥地方失火者八旗兵鞭一百綠旗兵棍責八十該管護軍校驍騎校委署護軍校領催千總把總紅旗管隊皆插箭遊營臨陣時軍營失火致誤大事者兵丁及該管委署護軍校領催紅

旗管隊悉斬以徇兵丁黃夜夢魘旁人即行喚醒
如有隨聲應和擾及營伍者八旗兵鞭七十綠旗
兵棍責六十該管委署護軍校領催紅旗管隊插
箭遊營臨敵營犯者皆斬管守營門縱人擅入者
八旗兵鞭七十綠旗兵棍責六十對敵時犯者斬
差往偵探之人遇賊投誠不稟報者八旗兵鞭七
十綠旗兵棍責六十如有投誠之人不即解送以
致逃散者八旗兵鞭一百綠旗兵棍責八十因而

洩漏軍中虛實者照洩漏軍機例治罪大兵進剿
敗賊後不奉大將軍令擅奪車馬輜重者插箭遊
營因而擾亂營伍者斬倚強欺弱酗酒為非不遵
約束輕者鞭責重者插箭污穢水泉飲不以次者
八旗兵鞭一百綠旗兵棍責八十支領口糧肆行
拋棄狼籍者八旗兵鞭一百綠旗兵棍責八十該
管委署護軍校領催紅旗管隊等不即呈報者插
箭兵行不按隊伍踐踏草地者八旗兵鞭一百綠

旗兵棍責八十劄營時牧放馬駝牛羊縱令蹂躪者八旗兵鞭一百綠旗兵棍責八十仍插箭遊營該管官插箭兵丁押運軍糧在途私竊升合或竊同行兵丁口糧及損傷盛米囊橐致多虧折者八旗兵鞭一百綠旗兵棍責八十弓箭撒袋腰刀皮索一切軍器不加收管致有遺失並應攜器械擅自離身八旗兵鞭一百綠旗兵棍責八十該管委署護軍校領催鞭四十紅旗管隊棍責三十護軍

校驍騎校千總把總等插箭在途見遺失刀箭等物拾取不稟報給還者八旗兵鞭四十綠旗兵棍責三十均插箭遊營無緊急事私行馳馬者八旗兵鞭五十綠旗兵棍責四十追奪馬匹令其步行兵行各按隊伍以次而前無論道路險夷寬窄有先後離隊攬越者八旗兵鞭五十綠旗兵棍責四十均插箭遊營結營之後各帳房出一人見藍旗則取柴見黑旗則取水有便溺者守門官兵驗明

照牌准其出入起更後不准出營違者八旗兵鞭
四十綠旗兵棍責三十該管委署護軍校領催紅
旗管隊等不嚴行約束者插箭夜傳軍令怠慢不
遵巡察坐堆偷安寢睡誤更曠班者八旗兵鞭一
百綠旗兵棍責八十該管紅旗管隊不察報者八
旗兵鞭五十綠旗兵棍責四十臨陣時犯者斬妄
行動作傲慢官長者插箭遊營各營馬步兵所攜
槍礮火藥不加謹收貯以致潮濕不能著火及玩

忽拋棄或用藥任意狼籍者八旗兵鞭五十綠旗
兵棍責四十該管紅旗管隊插箭遊營如有遺失
火藥者八旗兵鞭一百綠旗兵棍責八十該管委
署護軍校領催紅旗管隊插箭遊營鉛彈務按槍
口之大小如式製造如鉛彈不合鎗口係平日演
放八旗兵鞭五十綠旗兵棍責四十皆插箭遊營
該管委署護軍校領催紅旗管隊插箭遊營護軍
校驍騎校千總把總插箭臨陣時兵丁用不合槍

口之鉛彈施放者斬該管委署護軍校領催鞭一
百紅旗管隊棍責一百護軍校驍騎校千總把總
插箭遊營營總叅領叅將守備記大過一次馬駝
牲畜不遵照傳檄如法牧養者八旗兵鞭一百綠
旗兵棍責八十該管護軍校驍騎校委署護軍校
領催守備千總把總插箭沿途所遇井泉飲馬之
時以次而前不得爭先擁擠有故意爭奪縱馬踐
踏污穢泉水者八旗兵鞭一百綠旗兵棍責八十

乾隆十三年

上諭軍旅乃國家第一要務軍法從事定例綦嚴今刑律內玩寇老師有心貽誤竟無正條非所以重軍務儆戒失律也夫科場作弊尚即正典刑若以行軍相較孰為輕重自應稽察舊案明著刑章俾衆知畏法方能鼓勇用命此非朕欲用重典實以昭示武臣肅紀律而勵勇敢辟以止辟之義也見在纂修會典著軍機大臣會同該部詳酌定議具奏旋議定重臣膺

閩外之寄自當戮力疆場綏寧邊徼至於玩愒偷
安甘心養寇傾險妬功忍心誤國實屬情罪重大
今按中樞政考軍令一篇均為所屬弁兵約法不
及統兵之人誠於責成專閩申嚴軍紀之意有所
未備嗣後凡統兵將帥玩視軍務苟圖安逸故意
遷延不將實在情形具奏貽誤國事者又凡將帥
因私忿媚嫉推諉牽制以致糜餉老師貽誤軍機
者又凡身為主帥不能克敵轉布流言搖惑衆心

藉以傾陷他人致誤軍機者均屬有心貽誤應擬
斬立決庶軍律嚴明而身任元戎者亦知儆懼奮
勵矣十四年

諭國家設立營伍領以將弁所以禁暴止奸折衝禦侮
責綦重也兵法失律有誅書稱不用命戮於社立法
之嚴如此近來法司衙門於官犯相蒙多入緩決因
而武弁亦邀寬典大非立法之本意夫軍旅之事國
家不能保其百年不用必當申明紀律信賞必罰方

足以振憲綱而作士氣誠使為將弁者在平時則勤訓練嚴拔補謹巡防以固疆圉設有緩急統帥則詳審機宜熟籌勝算其偏裨士卒則奮勇爭先推鋒陷陣不避矢石効臂指之使自能克敵制勝若平時不能拊循而流於廢弛或苛急而激為忿怨偶遇小醜竊發則號令不明指揮不定畏葸退縮縱寇老師或臨陣之時望風委靡甚至欺蔽容隱負恩債事國家所倚以為干城腹心者何在此而不誅何以示懲乃

使久繫囹圄累歲經年虛擬罪名獲全首領是亂法也後之任事者何由知戒朕以仁治天下慎重民命罔敢弗欽而天討所在朕勿敢赦如訥親張廣泗之誤國負恩屢頒諭旨已立正典刑慶復之欺蒙縱寇亦已賜令自盡而詳閱秋期審冊內除李質粹宋宗璋尚須待質表士弼情非退縮應該緩決此外如許應虎之失誤軍機臨陣退縮沈瑞龍之私回任所託病偷安胡璘劉種之恇怯退避離汎失守又如張通

楊文富之棄地不守阻回援師皆法之斷不容貸而情之毫無可原者即其中有先經緩決之犯皆令改擬予勾正法以為炯戒凡在披堅執銳之徒當思臨陣爭先赴蹈危險死於鋒鏑或所不免而國家加恩贈卹廕及子孫如有退縮偷安挫衄失事縱一時苟免終於身伏斧鑕等死耳死敵者榮死法者辱雖至愚亦當審擇而知所處矣若專事姑息積玩成疲於軍務大有關係訥親張廣泗慶復之敢於貽誤未

必非向來失律倖免人心無所震悚有以啟之也今
於勾到後特頒此諭詳悉開導令武臣咸知僨事者
必無軼罰罹罪者斷難倖生與其伏法於誤事之後
不如捐軀於臨事之時大義昭然將必致身効命以
戰則克以守則固不致苟且偷生蹈於顯戮正辟以
止辟之義也此諭著刊刻頒發令內外武職衙門入
於交盤冊內永遠傳示各宜凜遵四十九年

頒發行軍簡明紀律

諭前因甘省勦捕逆回時綠營官兵於馬家堡打仗因軍裝火器被雨潮濕俟烘烤完妥再為前進並有懦怯退縮者當經降旨通飭各督撫務宜隨時加意整頓今逆回之事雖完但思整肅營伍固在督撫提鎮之實心督飭而平時操演講習更在將弁之面為指導兵丁之明曉軍律國家累洽重熙承平無事兵可百年不用不可一日無備與其臨時告誡不若先事講求著軍機大臣會同該部將行軍紀律擇其緊要

數條務須簡切明當使兵丁人人知曉盡成勁旅以
示朕整飭戎行之至意

一兵丁隨征勦賊俱應奮勇直前其見賊退走者
不過各惜身命心懷畏怯試思臨陣退走律應斬
首示衆若能殺賊立功必蒙陞賞即或陣亡

國家自有卹典子孫俱得邀恩兵丁等與其臨陣畏
蒺難逃

國法何如爭先殺賊奮不顧身況勇往向前未必即

死一經退後斷不得生此理甚明該管將備等平時將此諄切告誡務令兵丁等咸知大義臨陣時自必勇氣百倍可期殺賊立功

一鳥槍弓箭最為行軍利器若兵丁等臨陣時尚未見賊遠將槍箭施放及至交戰火藥箭枝俱已用完無以禦敵即同束手待斃關係甚重凡領兵將備平日務須時加講習令兵丁於臨陣遇賊槍箭可及之處不先不後一齊施放庶槍箭隨聲應

手皆獲實用

一行軍攜帶軍裝火藥俱應在帳房收貯毋令潮濕卽或途中遇雨亦須嚴密遮護庶遇賊緩急可用凡帶兵將備等須嚴加曉諭勿致潮濕或需烘烤以致臨時貽誤至弓箭槍刀等項平時尤須修整堅利不得廢弛

一臨陣對敵倘遇將領受傷隨從兵丁更當奮勇直前竭力救護若兵不顧將各惜身命觀望退阻

最為惡習亟應申明軍紀俾衆知悉凡有將領受傷兵丁不即時救護竟至潰散脫逃者立即查明按名處斬其能奮勇保護者立即議功優賞以示鼓勵該管將備等平日尤當愛恤士卒臨時賞罰公平庶兵將同心合力所向無敵

一兵丁對敵乘勝追趕刻不容遲若兵丁等有貪搶賊人遺棄財物以致賊衆逃遁貽誤不小該將備等於領兵臨陣時務須通行曉諭違者立即依

律治罪庶兵丁等各知儆畏

一營卡最關緊要凡領兵將備等務須嚴飭坐卡兵丁輪班防守留心偵探毋得怠惰偷安即探察有事只須選派明幹一二人密行飛稟餘仍嚴整坐守毋許輕動無事時不許高聲叫喊致亂營規違者俱照軍法處治

一兵丁遇有調撥自當恪守軍令即時遄行如敢騷擾地方欺壓良民蹂躪田禾搶掠財物等事即

應按律從重治罪該管將備等平日加意教誡臨時又當嚴行約束無許違犯

一兵丁奮勇殺賊應予獎賞但恐兵丁等希圖冒功任意朦混不可不預為防範凡軍法將他人戰功冒為己功及謊稱實在効力將無作有以輕報重者斬該管將備等應隨時曉諭親自稽查俾立功者得賞冒功者治罪以期核實

一行軍馬駝最宜愛惜凡兵丁等收放須揀擇水

草芻廩須按照時候遇有疲乏加意調養夜間尤宜小心看守偶有遺失須立時尋獲至所挖井泉不許污穢飲馬各挨次序毋許爭先以致壅塞如有違犯立即重懲不貸

一劄營後巡邏防守毋得疎懈夜間不許無故行走帳房內更要小心火燭遇有警報靜聽將令不得輕舉妄動若奉有密令須各自遵守毋得私相漏洩該領兵將備等尤宜申明號令隨時曉諭不

得疎懈

皇朝通典卷七十五

欽定四庫全書

皇朝通典卷七十六

兵九

軍政 巡防附

凡軍政五年一舉考察中外武職以定黜陟注上
考者薦舉卓異注下考者糾劾該管官具疏以

聞不入舉劾者以中平注考彙送兵部部會都察院兵
科京畿道察覈題覆奉

旨以卓異加一級注冊候陞其以軍政糾劾貪酷革職
提問罷軟不謹革職老病休致才力不及降二級
浮躁降一級皆調用前有卓異應陞及加級紀錄
均不准抵銷

考察八旗武職在京管旗大臣及各省將軍都統
副都統等俱開列事實清冊在京於九月內送部
在外於十月內送部兵部彙齊繕具履歷清單進
呈至在京文員兼旗下武職者仍於京察時聽該部

院衙門考察不在軍政之列鑒儀衛滿洲各官八旗世職人員俱不行考察此外各衙門所屬武職各該管官詳核填注考語定以四格曰操守曰才能曰騎射曰年歲糾以八法曰貪曰酷曰罷軟無為曰不謹曰年老曰有疾曰浮躁曰才力不及並將各該員履歷及有無在軍前行走受傷得功之處注明分別應去應留造冊送部其堪膺薦舉官員必須行止端方弓馬嫻熟管轄嚴肅當差勤慎

不擾該屬給餉無虛考語併歷俸已滿三年任內
並無事故兼試問

國語方准薦舉屆期兵部將管旗王貝勒等滿洲蒙古都統前鋒統領護軍統領滿洲蒙古副都統滿洲補授漢軍都統副都統兵部滿洲堂官職名開列
請

旨派出考察具奏其前鋒營護軍營官員軍政卓異由
領侍衛內大臣會同前鋒護軍統領等揀選薦舉

至各省駐防官員俱照在京官員之例該將軍都
統副都統等考察河南太原二處駐防官員該巡
撫考察其良鄉寶坻固安東安霸州采育里保定
府雄縣滄州九處駐防官員三年一次派有護軍
統領或副都統前往巡察管轄即令會同該管官
考察具奏內外考選軍政冊限於本年十月具題
乾隆二十四年二月

諭向來內外文武三品以上大員遇京察軍政之年援

例自陳文具相沿無裨實政曾經降旨停罷第念伊等洊陟崇階並由特簡其人賢否優劣雖已均在洞鑒然其間亦不乏旅進旅退苟圖持祿戀棧之人若以平時既無大過足干例議又不按例甄核任其迴翔日久必致職業不揚甚非澄叙官聯之道嗣後兵部於軍政時將在京之都統副都統在外之駐防將軍都統副都統各省之提督總兵官分列為三本繕具簡明履歷清單進呈候朕鑒裁以重考績大典著

為令四十二年十月

諭據伊勒圖奏稱本年係應軍政之年將伊犁二城滿洲錫伯官員等照例考試分別定議保題等語向來定例伊犁官員等遇軍政之年保舉卓異後不令特行送京引見者原因伊犁為極邊地方往來拮据是以停其特送引見但此等卓異人員軍政大典攸關未經引見而將軍大臣等閱看即作為卓異亦不合宜嗣後伊犁等處官員遇軍政之年將指為卓異者

臨時奏聞註冊俟伊等應陞之缺保送引見時將卓異之處一併聲明具奏俟引見之日朕允准後再准其卓異其協領等內指稱為卓異者亦俟伊等年滿送京引見之時一併聲明具奏引見之日朕允准後再准其卓異旋議定駐防旗員視地之大小官之多寡以定額黑龍江薦舉七人

盛京六人吉林察哈爾各五人西安伊犁各四人江寧杭州荊州烏魯木齊各三人綏遠城寧夏廣州

成都熱河密雲各二人山海關涼州青州福州河
南太原巴里坤各一人餘無定額舉非其人者論
如法入於計典官干六法者

謂不謹以
下六條

五品以下

應否引

見由部疏請其應革職官罷任候

旨曾出征効力以老疾休致者審其資格覈其軍功量
予

恩俸有差如有原兼世職及世襲佐領者分別降留

考察綠營武職鑾儀衛漢冠軍使至整儀尉由本
營官注考達部京營千總以上直省營守備以上
以次聽察於其長冊注考語定以四格曰才技曰

年力曰馭兵曰給餉糾以八法

與八旗
考察同

京營由步

軍統領覈實達部直省綠營由總督巡撫提督覈
實具疏衛所千總由司道注考督撫覈疏薦舉官
必以才技優長年力強壯馭兵有術給餉無虛又
覈其閱俸三年任內並無叅罰迺為合格其因公

降罰而廉能過人者降盜案處分外亦准卓異合格之遊擊以上引

見未滿三年者具奏請

旨已滿三年及都司以下均檄令送部引

見奉

旨准卓異注冊候陞其既膺薦舉後至下次軍政時或因較俸尚未陞用如以考核列入平等者即將上次薦舉卓異加級註銷入於計典官如曾出征受

傷著有勞績除犯貪酷外應革職休致者仍給原品
其年老而精力未甚衰憊尚可辦事者或仍留原
任或調補簡缺該督撫提鎮酌量辦理請

旨遵行如果不堪錄用或予守糧一分或令子弟入伍
以養餘年又以二年半為期甄別綠營將備由督
撫提鎮各簡其所管副將及守備等官賢能合格
者陝甘舉五人直隸江南福建浙江湖廣四川廣
東各四人山東山西江西廣西雲南貴州各三人

河南二人及應劾之將備均具疏請

旨薦舉者予紀錄糾叅者准八法議處如值軍政之年
停其甄別

乾隆三十七年八月

諭旗員補用綠營原以滿洲風俗淳樸技藝優嫻將伊
等錄用自能為綠營表率以挽漢人習氣而外任所
得養廉較多伊等所得既多亦於生計有益此朕教
養滿洲奴僕之至意也伊等到任後理應謹守滿洲

舊習以技藝為要多方教導毋染漢人習氣不行靡
費守分安常即至回京時僅可度日乃竟有在外全
忘滿洲舊習反染漢人習氣凡事尚華不知撙節任
意浮靡又甚至買妾置婢彼此效尤若年老無嗣置
妾尚可無故為身體安逸倣效而行此何理乎殊不
知朕愛養滿洲奴僕之意著交八旗大臣通行曉諭
所管應陞外省之侍衛章京官員等嗣後凡補放綠
營人等到任後須謹守滿洲淳樸之舊習操演技藝

毋效浮華糜費之惡習以作綠營人等之表率如不知悛改仍有似此者一經查出定行從重治罪著交各省總督提督巡撫等除嚴行曉諭各員外留心細查如有故違者即據實叅奏毋得姑息三十九年十一月

諭據周元理奏查閱營伍情形摺內稱遵化州遊擊佛爾清額牆子路都司福英馬箭均欠純熟勤限半年學習再行考驗所辦非是旗員簡用外任原因綠營

弓馬平常令其表率俾有所觀法咸成勁旅該員等
自當感激朕恩益加奮勉身先倡率訓練兵丁學習
弓馬方為無忝委任若徒虛糜廩俸貪逸養安其於
滿洲體面盡失尚足為綠營標準乎今佛爾清額福
英馬箭均未純熟致被周元理看出則其生疎不堪
可知即不稱將領之任至綠營勒限半年學習舊例
在庸懦漢員偶一引用其知恥者尚當赧顏況滿洲弓
馬本所嫻習初用時皆經朕引見發往何以甫至

外任即盡行荒廢轉欲援綠營漢員之例學習稍有
人心者尚不知羞惡若此耶昨因直隸副將瑪爾清
阿遊擊武靈阿赴東省協勦賊匪頗能奮勉出力不
愧滿洲勇敢之風當即加恩陞擢用為總兵叅將若
佛爾清額福英之弓馬生疎豈可復為姑息佛爾清
額福英俱著即解任回京引見再降諭旨嗣後各省
綠營旗員如有弓馬生疎廢弛營伍者均著照此例
辦理

巡防

凡巡防之制外海巡防

盛京以協領為總巡佐領防禦驍騎校為分巡直省
以總兵官為總巡副將以下為分巡各於所治界
內率舟師沿海上下更番往來以詰姦禁暴兩界
相交之所戒期會哨同時並集聯名申報將軍總
督提督察覈委官稽查若因風汛阻滯或先或後
各以到界之日申報其期約以二四五月為始至

九月事竣回營其有引避不巡及巡有不周者論如軍律內河巡防長江自四川巫山而東出三江口至湖廣界過岳州武昌興國至江西界下九江南昌至江南界經安慶江寧京口狼山東至於海由將軍督撫提鎮分委旗標弁兵沿沂江流上下游巡及交界之處會巡申報互相考覈與外海巡防同若巡海遭風受傷者在外洋官準軍功加級兵準一等傷給賞在內洋官準軍功紀錄兵準二

等傷給賞身故者在外洋官兵皆照陣亡之例在
內洋官照陣亡例減一等兵減半各給卹典若在
黃河大江及洞庭洪澤等湖遭風者視外洋賞卹
各處墩臺營房

國初定邊境設立墩臺營房以司偵瞭遇有緊急舉
烟為號寇至百人者挂席一領放礮一聲至三百
人者挂席二領放礮二聲至五百人者挂席三領
放礮三聲至千人者挂席五領放礮五聲至萬餘

人者挂席七領連放礮聲接遞傳達

康熙七年題準各省孔道均設墩臺營房撥兵看守如有緊急軍機接遞傳報

乾隆三年奉

旨各省水陸孔道之旁設立墩臺駐宿兵丁所以護衛行人稽察匪類朕聞外省情形種種不一其間兵卒成行器械成列於行李往來之時留心防護者有之防汛至二三人而不成行列器械不整者有之營房

雖設而聞其無人一任偷竊潛行漫無知覺者亦有之大抵與督撫提鎮等駐劄大營相近者尚覺整齊其遠者即多廢弛夫防汛兵丁既無差操之勞專司稽察之事而乃怠惰縱逸至此則國家設立汛兵之意安在皆該管官弁約束不嚴董率不力有以致之其如何增設懲警之法令督撫提鎮等轉飭所屬將弁實心奉行俾各勤於執業不似從前之耽逸偷安任意曠誤著兵部定議具奏旋議定各省督撫提鎮

將所屬地方詳細籌畫除汛兵已經足額者毋庸
再行撥補外其有汛兵闕少之處各按地方衝僻
情形即行撥補所有器械務須整齊仍令該管官
不時察驗倘有離汛偷安曠誤汛防者將兵丁責
革別補該管官稽察不力者照約束不嚴例議處

皇朝通典卷七十六

欽定四庫全書

皇朝通典卷七十七

兵十

教閱

兵籍附

京營

領侍衛府三旗親軍教閱之制鑲黃旗每月於初二十六兩日習騎射二次於初六十一二十一二十六等日習步射四次正黃旗每月於初三十七

兩日習騎射二次於初七十二二十二二十七等
日習步射四次正白旗每月於初四十八兩日習
騎射二次於初八十三二十三二十八等日習步
射四次

八旗驍騎營教閱之制每月於初四初八十三十
八二十三二十八等日習射六次都統以下各官
親往監視春秋二季撥甲習步射二次由旗定期
咨部撥甲習騎射二次由部定期通行又春月分

操二次合操一次秋月合操二次預奏操期仲春
孟秋之日按期登城習鳴螺兵部遣官稽察歲以
為常其八旗漢軍鳥槍兵於春秋月各演鳥槍四
十五日歲仍合操二次季秋月試礮於蘆溝橋每
旗各出礮十位演放五日間三歲則於蘆溝橋以
鳥槍營兵與礮營兵合演槍礮藤牌兵每年春秋
二季四旗合操四次八旗合操二次又於初冬分
派各旗演習步圍每年二次或三次

八旗前鋒營教閱之制每月於初二初六十一十六二十一二十六等日習步射六次春秋二季擢甲習騎射二次又於左右翼內各分前鋒之半兼習鳥槍月演十次均由統領督率所屬如法訓練每年秋季前鋒統領會同護軍統領奏聞率所屬兩營官軍演習步圍兩三次

八旗護軍營教閱之制每月於初二初六十一十六二十一二十六等日習步射六次春秋二季擢

甲習騎射二次與前鋒營同

圓明園八旗護軍營教閱之制每月習步射六次春秋二季習騎射演放鳥槍與八旗護軍營同

八旗步軍營及巡捕營教閱之制八旗步軍習步射城門驍騎習鳥槍均以春秋操演步軍翼尉同城門領更番考閱內九門外七門安設礮位每屆三年四門一次隨同八旗運往蘆溝橋輪流演放巡捕營叅將遊擊月考其屬之弓矢守備千把總

各練汛兵春秋習鳥槍與城門驍騎同

內府三旗教閱之制每月習射六次春秋二季擐甲習射二次每年立冬後內府護軍並尚虞處侍衛鷹狗房執事人等演習步圍又遴選三旗護軍學習馬射等技藝各以時操演

火器營教閱之制每月演習步射六日騎射六日馬上技藝六日各於本旗教場齊集其鳥槍礮護軍驍騎該管官按日於本旗公所考驗合操日八

旗分左右翼行陣施放槍礮九次至第十次礮與
鳥槍連環施放無間每年秋季俟八旗漢軍礮位
演放完竣後奏請往蘆溝橋演礮五日

健銳營教閱之制每月逢四九日期合操雲梯護
梯鳥槍大隊鳥槍馬上三槍過馬騙馬扎槍貫跂
等技藝逢二七日期合操雲梯護梯鳥槍馬上三
槍及騎射步射舞鞭舞刀等技藝其餘日各於本
旗較馬步射施放鳥槍恭遇

駕駐圓明園自三月初一日起每日左右翼輪流演水
戰用船四逢八日期大操用船八若遇啟

駕巡幸行圍以後則按三八日期操演凡較閱每年自

七月十六日開操至次年四月十六日止若遇閏

七月即於閏七月十六日起其封開印信日暫停

八旗設立教場鑲黃旗教場在安定門外正黃旗

教場在德勝門外正白旗教場在東直門外鑲白

旗教場在朝陽門外正紅鑲紅兩旗教場均在阜

成門外正藍旗教場在崇文門外鑲藍旗教場在
宣武門外各設演武廳該都統等以時督率訓練

順治七年

世祖章皇帝諭我朝以武功開國頻年征討不臣所至克
捷皆恃騎射今苟

天庥天下一統勿以太平而忘武備尚其益習弓馬務造
精良

康熙十二年

聖祖仁皇帝諭漢軍不能騎馬者甚多每旗應設一營操練火器議政大臣等集議以聞尋議覆八旗漢軍鳥槍驍騎每佐領下增十八名共二十名演習鳥槍得旨火器關係武備甚為緊要應嚴加操演以裨實用

雍正五年

世宗憲皇帝諭火器營甚屬緊要馬上教習熟練方為有益凡屬滿洲以騎射為根本不可專習鳥槍而廢棄騎射兵丁在馬上射箭放槍著加意熟習再兵丁內有自

已養馬學習鳥槍技藝及勤謹効力當差者爾等即當
勸勉以優等記名其或行走不及者亦當誘之於善教
訓兵丁須如教訓自己子弟不可遽加苛責若有下愚
不移之人或經再三教訓仍然行止妄亂者豈可留之
京師爾等當即行奏聞發遣十年

諭兵可百年不用不可一日不備帝王之治天下未有不
以武備為先務者而兵丁之演習武藝亦未有不勤加
訓練而能有成者從來士農工商各習一業苟不專心

竭力則其業必不精況兵丁所司戰鬪之事非膂力剛強不能披堅執銳非習藝嫺熟不能克敵宣威奈何怠惰苟安虛度歲月不思設兵之本意不念已身之職業乎國家承平日久人耽安逸武備漸覺廢弛今當邊陲用兵是以令勤操演又不令直班俾得專心訓練復給以飯銀資其日用無非體恤勤勞也爾等各宜勉力學習如騎射長槍之類必令純熟精強成國家之勁旅以柔弱怯懦為恥以安逸華麗為戒人之力量用則日增

不用日減如出城操練正可演習步行又何必騎馬乘車若此等者一經察出必從重治罪

乾隆十四年

上諭去歲金川用兵朕思我滿洲兵向用雲梯攻城因命八旗於前鋒護軍內擇年壯人材健勇者千人特命大臣監視操演所選兵各奮勉學習不數月間皆已精練隨征金川功成凱旋如令仍回本營隨旗行走則伊等前功徒費且我滿洲舊日技藝仍至廢弛

若將伊等專設一營演習均可為精銳兵於緩急之用更有裨益遇有行幸令伊等隨往圍獵學習行走更得嫻熟俟回軍之日不必令回本營專令大臣數人管轄特簡大臣一人總統其如何設營伍操演遇行幸隨蹕再如何施恩使得陞轉之途著大學士公同管轄操演之大臣等詳議具奏尋議准設立健銳營雲梯兵一千名專習雲梯鳥槍馬步射馳馬躍馬舞鞭舞刀諸技又於昆明湖設趕繒船以前鋒

軍習水戰駕船駛風之技十七年

諭朕恭閱

太宗文皇帝實錄內載崇德元年十一月癸丑

上御翔鳳樓集諸親王郡王貝勒固山額真都察院官

命弘文院大臣讀大金世宗本紀

上諭衆曰爾等審聽之世宗者蒙古漢人諸國聲名顯著之賢君也故當時後世咸稱為小堯舜朕披覽此書悉其梗概殊覺心往神馳耳目倍加明快不勝歎賞朕思

金太祖太宗法度詳明可垂久遠至熙宗及完顏亮之
世盡廢之耽於酒色盤遊無度效漢人之陋習世宗即
位奮圖法祖勤求治理惟恐子孫仍效漢俗豫為禁約
屢以無忘祖宗為訓衣服語言悉遵舊制時時習練騎
射以備武功雖垂訓如此後世之君漸至懈廢忘其騎
射至於哀宗社稷傾危國遂滅亡乃知凡為君者耽於
酒色未有不亡者也先是儒臣巴克什達海庫爾禪屢
勸朕改滿洲衣冠效漢人服飾制度朕不從輒以為朕

不納諫朕試設為比喻如我等於此聚集寬衣大袖左
佩天右挾弓忽遇碩翁科羅巴圖魯勞薩挺身突入我
等能禦之乎若廢騎射寬衣大袖待他人割肉而後食
與尚左手之人何以異耶朕發此言實為子孫萬世之
計也在朕身豈有更變之理恐日後子孫忘舊制廢騎
射以致漢俗故常切此慮耳我國士卒初有幾何因嫺
於騎射所以野戰則克攻城則取天下人稱我兵曰立
則不動搖進則不回顧威名震懾莫與爭鋒此番往征

燕兵出邊我之兵威竟為八大臣所累矣故諭爾等其
謹識朕言朕每敬讀

聖謨不勝欽凜感慕惟深國家開創之時我

祖宗躬親勞瘁勤求治理矩矱相傳罔敢踰越以立萬世
之丕基至於今咸受無疆之福者皆仰遵

明訓所致也我朝滿洲先正遺風自當永遠遵循守而勿
替是以朕嘗躬率八旗臣僕行圍較獵時時以學習
國語熟練騎射操演技勇諄切訓誨無非率由舊章

期以傳之奕禩永綿福祚惟是我

皇祖太宗聖訓所垂載在

實錄若非刊刻宣示則累朝相傳之家法外廷臣僕何由
共悉且自古顯謨令典多泐之金石曉諭臣工我

皇祖太宗之睿聖時申誥誡昭示來茲益當敬勒貞珉永
垂法守著於紫禁箭亭御園引見樓及侍衛教場八
旗教場各立碑刊刻以昭朕紹述推廣至意俾我後
世子孫臣庶咸知滿洲舊制敬謹遵循學習騎射嫻

熟國語敦崇淳樸屏去浮華毋得稍有怠惰式克欽承

彞訓冀億萬世子孫共享無疆之庥焉十八年

諭騎射國語乃滿洲之根本旗人之要務朕今歲校閱京城世爵其射箭尚可觀及人材英俊者已施恩選取侍衛並分在各處令其學習行走其射箭甚劣不堪教化者察明革職別行承襲至各省駐防亦皆有世爵若不教訓騎射國語伊等近於素餐安逸之習

必致學為不善著各省將軍都統等將伊等不時教
導務使騎射優嫻國語純熟如有教訓不化騎射甚
劣者該將軍都統等即指名叅奏革職別行承襲將
此通行傳諭知之

直省

八旗駐防營以將軍都統副都統掌其教閱訓練
騎射演放槍礮並以時親臨閱試第其優劣以為
賞罰春秋合操均與京營同八旗水師營每年春

秋二季將軍都統副都統等督率官兵分駕戰艦
金川福建乍浦廣東赴海口黑龍江齊齊哈爾默
爾根江寧於江面天津赴海口每年四月起八月
止均擇天氣晴和潮平風順時出洋列陣張帆起
碇掌號鳴礮以次操演停操之後仍各率官兵講
習水務

陸路綠旗營總督所屬為督標巡撫所屬為撫標
提督所屬為提標總兵所屬為鎮標總督節制巡

撫提鎮提督節制鎮標每歲秋季霜降日申令本
標官兵校閱於演武場前一日各營將弁肅隊伍
赴教場豫立軍幕屆日黎明軍士擐甲列陣中軍
建大纛於場正中將臺上傳令合操中軍揚旗麾
衆臺下舉礮三軍中鳴角擊鼓步騎甲士列隊行
陣施放槍礮連環無間並如京營之制若長槍籐
牌副刀短兵之屬各因其地之宜以教士卒皆有
成法閱畢試材官將士騎射技勇申明賞罰犒勞

軍士各釋甲歸伍漕運總督河道總督屆期教閱
本標官兵亦如之其各營將弁隨時訓練本管軍
士分按日期綠營水師有內河有沿江沿海出洋
信候各省不同每歲春秋季月或夏秋之季乘艦
列陣揚帆駛風鳴角發礮操演具如軍律

乾隆元年

諭各省營伍離提鎮遼遠不能親身稽察該督撫酌量
地方營制如何令提鎮等隔數年一次親身察閱詳

議具題尋議准直隸提督分所屬為三路歲閱一路
三歲而遍馬蘭宣化正定三鎮歲各一閱泰寧天
津二鎮二歲各一閱山東兗州鎮臨清沂州等處
分路歲閱登州鎮西南東南等處分路歲閱二歲
而遍山西太原大同二鎮歲各一閱河南南陽河
北二鎮歲各一閱江南提鎮歲各一閱江西南昌
南贛二鎮歲一閱二歲而遍閩浙總督蒞任一閱
水師提督一歲閱海壇閩安烽火門等處一歲閱

金門南澳銅山等處二歲而遍陸路提督一歲閱
興化福州福寧建寧延平等處一歲閱泉州漳州
龍巖汀州邵武永春等處二歲而遍海壇金門南
澳臺灣四鎮水師歲一閱福寧汀州建寧漳州四
鎮陸路歲一閱浙江提督三歲一閱定海黃巖溫
州三鎮歲各一閱衢州處州二鎮歲各一閱湖廣
總督蒞任一閱提督歲閱湖北湖南二歲而遍襄
陽宜昌永州鎮筄四鎮歲各一閱陝甘總督五歲

一閱提督三歲一閱延綏興漢河州涼州寧夏西
寧肅州七鎮歲各一閱四川北重慶建昌松潘
四鎮三歲各一閱廣東左翼右翼高州瓊州碣石
潮州南澳七鎮歲各一閱廣西提督三歲一閱左
江右江二鎮歲各一閱雲南貴州提鎮所屬酌數
年內一閱各疏報出巡回任日期及各營汛官兵
技藝是否純熟軍裝器械是否齊全以待部核十
年

諭國家設立營伍修明武備以為折衝禦侮之用必訓
練精熟於平日斯可奮勇決勝於臨時是以陸路設
營汎沿海設水師皆須勤演習以收實效自去年朕
命大臣察閱營伍後陸路該管大員頗肯竭力整頓
氣象而水師操演則不過將演就陣法塞責了事其
操舟破浪之法官弁兵丁茫然不知以為此水手之
事漫不留意即至舵工水手其能熟練者亦屬寥寥
平日操演之時各船進退尚且參差往來間斷苟其

臨敵何以致用夫水手以舟為主出沒風濤去來倏忽必掌舵者能操縱自如而搶風折艤破浪衝波水手等盡能嫻習即官弁兵丁等亦皆心領神會不待呼應而自靈然後猝然遇敵駕駛輕捷一舟之中臂指相使如一人之身則應變制勝無難向來水師官弁仍以水師用原欲其熟悉情形收得人之效今則視為故套該管者不加察徼倖者苟延玩是育材之善政為容身之捷徑矣著通行申飭沿海將軍督撫

都統提鎮等務遵朕旨實心訓練實心甄別毋得仍前玩忽虛應故事十一年

諭國家設立營制所以嚴拱衛而固苞桑務在選精銳以儲干城勤訓練以資捍禦所謂兵可百年不用不可一日無備也從前因各標營日漸廢弛朕命大臣前往山東河南江南等省先行閱看並降旨申飭復於督撫提鎮奏摺中時加批諭令其實力整頓今各省操演之法大抵旗纛戈甲期以飾觀步伐陣圖似

為練習其實在技勇精強弓馬嫻熟者甚少在水師
營汛亦不過演就水陣聊以塞責而已即軍政薦舉
未能盡屬公當徒為具文以是整飭戎行豈能使辟
壘一新士氣日奮即如西北稱勁旅而江浙多柔脆
不知既以為兵自應鼓其銳氣使弱者日近於強豈
可任其委靡不加振作蓋營伍之中兵馬錢糧甲冑
器械皆宜事事留心向來虛冒兵糧私扣朋馬夤緣
技補抑借軍裝等弊猶未盡除而教訓演習惟事粉

飾因循怠忽尚沿舊習殊非設兵衛民之意是必立
定年限專差大臣閱看庶將弁知有責成不敢怠廢
而各兵亦知有考驗時時警惕技藝不致生疎於戎
行自有裨益朕前旨與以三年之限著兵部請旨並
未定有分省察閱之年分今已閱之省則已過三年
其餘則未命前往也其如何分年分省差大臣往閱
著該部定議俟臨時酌量或自京師命大臣前往或
即命本省督撫察閱尋議定自乾隆十二年為始閱

直隸山西陝西甘肅四川十三年閱湖北湖南雲
南貴州十四年閱福建浙江廣東廣西十五年閱
山東河南江南江西周而復始但地方遼濶若止
欽命大臣一人勢難周遍至甘肅處極邊安西提標駐
塞外若令閱川陝之大臣並閱則廣遠難周請於
應閱直隸等省之年差往直隸山西一人陝西四
川一人甘肅一人應閱湖北等省之年差往湖北
湖南一人雲南貴州一人應閱福建等省之年差

往福建浙江一人廣東廣西一人應閱山東等省
之年差往山東河南一人江南江西一人兵部於
每年開印後將應閱之省分並滿大學士領侍衛
內大臣都統尚書侍郎名單開列奏請或

欽點大臣前往或即令該督撫就近察閱恭候

欽定再向來各省督撫提鎮原有分年察閱營伍之例
嗣後各省如遇

欽點大臣察閱之年該省督撫提鎮停其察閱至當提

督簡閱之年則各鎮停簡閱當督撫簡閱之年則提鎮概停簡閱十八年

諭各省標營分年特派大臣查閱又督撫提鎮有統轄操防之責例應以時巡視所以簡軍實嚴武備也是以各兵之漢仗技勇為本至於旗幟衣帽期足以別隊伍整軍容無缺可矣奚事增美焉近來外省營汛每遇大員蒞閱往往先期部署為一切觀美計製造旗幟更易號衣公費不足遂坐扣兵餉以致伊等生

計為艱是營伍未有整頓之實而丁兵先被扣餉之累殊非巡查簡閱之本意嗣後查驗兵丁務覈其實毋以旗章衣服粉飾外觀至或有欵差大員經過營汛地方兵丁循例站隊者亦俱無庸張設旗幟總之整飭戎行全在漢仗技勇其緣飾之具皆屬無益之虛文而因以扣餉瘠兵則尤其大不可者著通行各省督撫提鎮咸共知之二十二年

諭今日朕至杭州省城其接駕之綠營兵丁有奏蕭管

細樂者夫身隸行伍當以騎射勇力為重戍樓鼓角
不過用肅軍容即古者鐃歌鼓吹之詞亦以鳴其得
勝之氣耳若吹竹彈絲技近優伶豈挽強引重之夫
所宜相效此等綠營陋習各省均所不免可傳諭各
省督撫提鎮等轉飭所屬標營嗣後營伍中但許用
鉦鼓銅角其簫管細樂概行禁止又

諭外省駐防將軍及綠營之提鎮出行則皆乘輿夫將
軍提鎮有總統官兵之責若養尊處優自圖安逸亦

何以表率營伍而作其勇敢之氣況旗人幼習騎射
即綠營中亦必以其弓馬優嫺始厯加陞用乃一至
大僚轉致狃於便安忘其故步此豈國家簡擢之意
耶京師都統副都統既皆乘馬而滿洲侍郎則無論
年踰六旬亦俱不得乘輿即朕巡省所至尚每日乘
馬而行乃外省武職獨相沿陋習此甚非宜嗣後將
軍提鎮概不許乘輿其編設轎夫並著裁革如有仍
行乘坐者照違制例治罪可通行傳諭知之三十九

年尚書公福隆安奏烏槍一項於軍器中最為得用而進步連環尤為烏槍中銳利之法八旗勁旅凡遇專操會操惟演九進十連環使之精熟是以所向無敵至各省綠營兵丁操演烏槍不過按照陣式虛應故事施之臨陣全屬無用即如征勦金川所有綠營兵丁放槍俱不得力直至派出京城健銳火器兩營兵前往始各展其所長轟擊殲賊幾無虛發近日臨清勦捕逆匪亦得京兵之力其

效已可概見伏思各省綠營原設鳥槍兵與其循
習虛文莫若練資實用請飭令各省督撫提鎮詳
查本省原設鳥槍兵若干俱令照健銳火器二營
進步連環鳥槍法式一體演習并飭該管大員董
率將領兵丁專心學習務使進退如法操練精嫻
庶臨用並能制勝而防守愈昭嚴飭矣五十年

諭國家設兵衛民可百年不用不可一日無備陝甘兩
省係邊陲要區設兵不為不多乃逆回兩次滋事綠

營兵丁懦怯退縮致賊匪得以蔓肆鴟張此皆承平日久督撫提鎮不能實心整飭各營將弁不加操演講習因循怠玩以致兵備廢弛屢經降旨嚴切訓飭若能如福康安加意整頓於各標營內挑出兵丁一半專意訓練俾軍律嚴明士氣勁銳一變綠營懦怯之習兩省共有三萬餘勁旅設或地方稍有不靖又何患不立時撲滅耶在雲貴四川兩廣福建等省係沿邊沿海重地自應照福康安所辦於各營內挑選

壯健勤加訓習使各有數萬勁旅庶平時足以重操防而臨時可以供調遣即腹地亦當如此留心簡練各省皆係總督專主營政而山東山西河南江西係巡撫兼提督銜著將福康安原摺抄寄各省總督及山東山西河南江西巡撫一體留心不動聲色皆有精兵之備亦一至要也又

諭烏槍實為行軍利器著傳諭各省督撫務令兵丁時時操演嫻熟兵役奉差捕賊毋得施放空槍以期共

收實效又聞各省營伍槍兵每不得拔補馬戰及外
委等以致槍兵無向上之心甚或以羸弱充數殊不
知臨陣殲賊烏槍弓矢尤為得力自應將熟練槍手
一體拔補俾知上進有階則更爭相鼓勵踴躍演習
兵籍

凡八旗親軍前鋒烏槍護軍於護軍驍騎步軍教
養兵壯丁內拔補護軍於驍騎步軍教養兵壯丁
內拔補驍騎於步軍教養兵正身壯丁內拔補步

軍於正身壯丁及戶下人內拔補教養兵於正身
幼丁內拔補領催於護軍驍騎內選充均由叅領
佐領選應補之人呈都統統領等簡覈錄其材力
驍勇者既入伍令各旗籍其名按季報部以時稽
其盈絀駐防兵由該管官於駐防壯丁內拔補若
駐防官子弟有嫺習騎射願於任所充伍者聽

凡直省考拔營兵以人才強壯技藝優嫺者充補
騎兵拔於步戰兵步戰兵拔於守兵守兵拔於餘

丁無餘丁乃募於民督撫提鎮本標及相近營汛
均親考拔餘令副叅考拔仍於巡閱屬營時覆覈
考拔失實及虛占名糧者論如法營兵令五人聯
名具保互相覺察其有不遵約束生事擾民容姦
保慝離次失伍有干紀律者皆論如法並坐其長

皇朝通典卷七十七